

SHIFOKOR

SAMARQAND DAVLAT
TIBBIYOT INSTITUTI
NASHRI

SO'ZI

GAZETA 1938 YILDAN "MEDITSINA FANI UCHUN" NOMI BILAN CHIQA BOSHLAGAN

Institut jamoasi Qo'shrabotda

O'zbekiston Respublikasining "Ta'lim to'g'risida"gi hamda "Mahalliy davlat hokimiyati to'g'risida"gi Qonunlari talablariga asosan viloyatda xalq ta'limi tizimida ta'lim sifati va samaradorligini oshirishga oid muammolarni o'rganish va ularni bartaraf etish, faoliyat yuritayotgan o'qituvchilarning kasbiy mahoratini oshirish bo'yicha oliy ta'lim muassasalari bilan umumiy o'rta ta'lim maktablari hamkorligini tashkil etish maqsadida Samarqand viloyati hokimligining 2022 yil 11-yanvardagi "Samarqand viloyatida ta'lim sifati oshirishga erishiladigan maqsadli ko'rsatgichlar bo'yicha oxirgi o'rinlarni egallagan maktablarda ta'lim sifati ko'tarish to'g'risida" gi 10-7-0-Q/22-sonli Qarori tasdiqlangan edi.

Ushbu qarorga muvofiq institutimizga viloyatimizning Qo'shrabot tumanidan 15 ta umumta'lim maktablari birlashtirilgan edi. 14-fevral kuni institut professor - o'qituvchilari va iqtidorli talaba-yoshlari tumanidagi mazkur maktablarga tashrif buyurdilar. Tashrif doirasida jumladan:

- Birlashtirilgan maktablar o'quvchilari va uyushmagan yoshlar vakillari institutning klinik kafedralari professor-o'qituvchilari tomonidan tibbiy ko'rikdan o'tkazildi. Birlashtirilgan 15 ta maktabga institut tomonidan ishchi holatdagi 50 ga yaqin kompyuterlar sovg'a qilindi.

Shuning bilan birga "Yashil makon" va "Yashil yillik" aksiyalari doirasida tumanning 15 ta maktabining barchasida 500 dan ortiq mevali va manzarali ko'chatlar o'tqazildi.

- Qo'shrabot tumanining 2-son umumta'lim maktabida "Sog'lom turmush tarzi"ni targ'ib qilish maqsadida Stomatologiya fakulteti professor — o'quvchilari, talabalari "Yorqin tabassum" shiori ostida maktab o'quvchilariga tushuntirishlar berib, maktab o'quvchilarini tibbiy ko'rikdan o'tkazib, kerakli ko'rsatmalar berildi.

- Oqtepa qo'rg'onchasining "Madaniyat uyi"da Tibbiyot instituti qaramog'idagi o'quvchilariga "Madaniyat uyi" xodimlari va institutning iqtidorli talabalari tomonidan turli milliy kuy — qo'shiqlar hamda turli chiqishlar taqdim qilindi.

- Biokimyо kafedrasi xodimlari ham Qo'shrabot tumanidagi 70-maktabga tashrifi doirasida mevali daraxtlar ekilib, xodimlar

va o'quvchilar tibbiy ko'rikdan o'tkazildi hamda bitiruvchi sinf o'quvchilariga mahorat darslari tashkil etildi. Shuningdek maktabga printer va laboratoriya jihozlari berildi.

- Tumandagi 11-maktabga 50 dan ortiq badiiy va jahon adabiyoti namunalari, 20 dan ortiq kimyo, fizika va biologiya fanlaridan elektron darsliklar berildi. Kimyo laboratoriyasi to'liq jihozlanib, virtual laboratoriyalar uchun televizor hamda uni ishlatish uchun virtual laboratoriya to'plami hamda darslarini sifatli o'tkazish maqsadida fizika xonasiga proyektor taqdim etildi. Bundan tashqari o'quvchilarning o'qishdan bo'sh vaqtlarini hunarmandchilikni o'rganishga sarflashlari uchun so'ngi rusumdagi tikuv mashinasi berildi.

Eng ahamiyatlisi shundaki ushbu maktablarda turli jabhalarda namuna bo'lib kelayotgan hamda a'lochi bo'lgan 20 nafar o'quvchiga SamDTI stipendiyasi taqdim etildi. Ushbu stipendiya har oy davomida berib boriladi.

Sog'lomlashtirish skrining tibbiy ko'riklari Qo'shrabotda

Institut malakali mutaxassislari tomonidan Qo'shrabot tuman Shovona oilaviy poliklinikasiga qarashli Boqi Chig'atoy qishlog'ida navbatdagi maqsadli skrining tibbiy ko'rik o'tkazildi.

Tibbiy ko'rik uchun xirurg, terapevt, endokrinolog, neyroxirurg, UTT shifokori, onkolog, ginekolog, oftalmolog, lor, pediater kabi ko'plab mutaxassislar jalb etildi.

Tashrif davomida 304 nafar fuqaro skrining tibbiy ko'rikdan o'tkazildi, aniqlangan kasalliklar bo'yicha 23 nafari tuman shifoxonasiga, 8 nafari viloyat shifoxonalari davolanish uchun yo'llanma berildi. Og'ir ahvoldagi bemorlar uyiga borib tekshirildi. Bundan tashqari maktabda o'quvchilar bilan uchrashib mahorat darslari tashkil qilindi.



E.Tangirov, Yoshlar masalalari va ma'naviy-ma'rifiy ishlar bo'yicha prorektor



Shoh va shoir

Zahiriddin Muhammad Bobur tavalludi

14-fevral o'zbek adabiyotining yirik namoyondalaridan biri, shoir, adib, olim, sarkarda, yirik davlat arbobi, "Buyuk Boburiylar sulolasi" asoschisi Zahiriddin Muhammad Bobur tavalludining 539 yilligi nishonlandi.

O'zbekiston Respublikasi Prezidentining 2021-yil 26-martdagi "Ma'naviy ma'rifiy ishlar tizimini tubdan takomillashtirish chora-tadbirlari to'g'risida"gi 5040-sonli Qarori ijrosi hamda buyuk shoir va mutafakkir, yirik davlat arbobi va sarkarda Zahiriddin Muhammad

Bobur tavalludining 539 yilligini munosib nishonlash maqsadida, institutning "O'zbek tili va adabiyoti, rus tili bilan" kafedrasini xodimlari 2-son TTJda talabalar bilan davra suhbatini o'tkazdilar. Tadbirida xalqaro ta'lim fakulteti dekani F.M.Raufov, dekan o'rinbosari M.O.Zaripov, fakultet tyutorlari hamda O'zbekiston yozuvchilar uyushmasi a'zosi, shoir va jurnalist Zubaydulla Ibragimov qatnashdi.

Tadbirida ulug' bobokalonimiz yod etilib, qoldirgan yirik badiiy meroslari ta'kidlandi. G'azallar va ruboiylar o'qildi.

Navoiyni anglash - o'zlikni anglash

Samarqand shahridagi Alisher Navoiy nomidagi markaziy istirohat bog'i erta tongdan davlat va jamoat tashkilotlari vakillari, professor-o'qituvchilar, yozuvchilar, shoirlar, talaba va o'quvchilar bilan gavjum bo'ldi.

Buyuk mutafakkir tavalludining 581-yilligi munosabati bilan bog' markazida o'rnatilgan Alisher Navoiy haykali poyida tadbir o'tkazildi. Unda buyuk bobokalonimizning hayoti, boy madaniy merosi va bugungi kunda yoshlar tarbiyasidagi o'rni xususida fikr yuritildi. Hazrat Navoiy asarlari dunyo xalqlarining bebaho ma'naviy merosiga aylangani qayd etildi. Tadbirida institutimiz jamoasi ham qatnashdi.



S.Halimov, Yoshlar bilan ishlash, ma'naviyat va ma'rifat bo'limi boshlig'i

"INSON QADRI UCHUN" SHIORI OSTIDA OCHIQ MULOQOTLAR



Institut professor-o'qituvchilari tomonidan Samarqand viloyatini tumanlarida "Inson qadri uchun" shiori ostida "Jonkuyar tibbiyot xodimlariga tayanamiz!" mavzusida turkum ochiq muloqotlar tashkil etilmoqda.

Institutda tuzilgan maxsus Ishchi guruh a'zolari tomonidan 4 fevraldan boshlab birlashtirilgan hududlar tibbiyot muassasalaridagi shifokorlar, hamshiralar va boshqa xodimlar bilan ochiq muloqotlarda sog'liqni saqlash sohasidagi dolzarb muammolar, ularning yechimlari, aholiga ko'rsatilayotgan malakali tibbiy xizmat sifatini yaxshilash bo'yicha taklif va tashabbuslar muhokama qilinmoqda. Jumladan, 4-fevral kuni mazkur muloqotlar Bulung'ur va Jomboy tuman tibbiyot birlashmalarida bo'lib o'tdi, 5 fevral kuni esa Urgut va Toyloq tuman tibbiyot birlashmalarini xodimlari bilan o'tkazish rejalashtirilgan.

Hududlardagi tibbiyot vakillaridan takliflarni yig'ib umumlashtirilgandan so'ng sohasi yanada takomillashtirish bo'yicha amaliy ishlarni joriy qilish belgilangan.

Italiya delegatsiyasi Institutda

Italiyaning Milan universiteti professori Diego Lops, "Osteocom" firmasi vakili Manuel Elia boshchiligidagi Italiya delegatsiya institutga tashrif buyurdi.

Italiyadan kelgan delegatsiya a'zolari SamDTI rektori J.A.Rizayev bilan uchrashdi. O'zaro muzokarada SamDTI va Milan Universiteti o'rtasida aloqalarni yo'lga qo'yish bo'yicha maqsadli ishlar kelishib olindi.

Tashrif davomida institutda yaratilgan sharoitlar, o'quv xonalari, zamonaviy laboratoriyalar hamda ta'lim jarayonlari bilan yaqindan tanishib chiqishdi hamda o'zlarining yorqin taassurotlarini iliq fikrlarida bayon qilishdi.

Tashrifning keyingi bosqichida Milan universiteti professori Diego Lops "Innovatsion Magnito dinamik texnologiyalarni stomatologiya sohasidagi tutgan o'rni" mavzusida institut professor-o'qituvchilari, klinik ordinator, magistr ordinatura (rezidentlar) va stomatologiya fakulteti talabalariga ma'ruza qildi. Diego Lops o'z ma'ruzasida ushbu mavzuda olib borgan ilmiy



izlanishlari, sohadagi yutuq va kamchiliklar, tish va milk muolajasi hamda tish implantatsiyasidan keyingi bosqichlar haqida gapirib o'tdi. Shuningdek, ushbu sohadagi jahon va Italiyada qo'llaniladigan ilg'or tajribalarini yig'ilganlar bilan bo'lishdi.

A.Axmedov, stomatologiya fakulteti dekani, dotsent

Turkiyalik shifokorlar ishtirokida amaliy seminar

Institut bilan hamkorlikda Turkiyaning "Medical Park", "Vm Medical Park", "Liv" bilan birgalikda "Tibbiyot fani va texnologiyasining zamonaviy yutuqlari" mavzusidagi amaliy seminar o'tkazildi.

Anjumanda Samarqand viloyatida o'z faoliyatini yuritib kelayotgan Akusherlik va Ginekologiya, Onkologiya, Xirurgiya, Urologiya mutaxassisligi bo'yicha shifokorlar qatnashishdi.

Xalqaro konferensiyaning ochilishida institutimiz rektori, professor Jasur Rizayev so'zga chiqib, Zamonaviy tibbiyotning yutuqlari haqida gapirdi.

Anjuman doirasida "Bepushtlikni davolashning zamonaviy usullari, EKU bilan davolash muvaffaqiyatlari", "Suyak ko'migi transplantatsiyasi", "Yangi texnologiyalar orqali onkurologiya va onkonefurologiyada davolashlarning afzalliklari", "Yuqori texnologiyali sog'liqni saqlash, organ transplantatsiyasi bo'yicha maxsus tadqiqotlar", "Umumiy onkologiya, kanserogenez, epidemiologiya masalalari, xatarli o'smalarni tashxislar va davolash tamoyillari", "Buyrak transplantatsiyasi" va "Ginekologiyada estetik jarrohlik" mavzulariga Turkiyalik mutaxassislar tomonidan ma'ruzalar o'qildi.

Kunning ikkinchi yarimida institutning 1 – son Xirurgik kasalliklar kafedrasida institut professori Zafar Kurbaniyozov hamda "Medical Park" professori Bulent Unal hamkorlikda jarrohlik amaliyoti o'tkazishdi.



Kelgusida institut hamda Medical Park tibbiyot markazi o'rtasidagi memorandumga asosan buyrak va jigar transplantatsiyasi bo'yicha ham jarrohlik ishlari olib borilishi rejalashtirilgan.

Ma'lumot uchun, Respublikamizda 5 ming nafar bemor jigar sirrozidan azob cheksa, ularning 500 nafari, ya'ni 10 foizi jigar transplantatsiyasi amaliyotiga muhtoj. Bugungi kunga qadar mamlakatimizda jami 10 ta jigar transplantatsiyasi amalga oshirilgan. Institut hamda Medical Park o'rtasidagi aloqalarning rivojlanishi ushbu jarayonning yanada yaxshilanishiga zamin yaratadi deb, umid qilamiz.

O'z muxbirimiz

MEDICAL ENGLISH DASTURI BO'YICHA DARSLAR BOSHLANDI

Institut talabalari bilimni chuqurlashtirish va mustahkamlash, tibbiyot sohasidagi kadrlarga ingliz tilini o'rgatish tizimini yanada yaxshilash maqsadida institutda Medical English o'quv dasturi tashkil etilgan edi.

Institut faol talabalarining tashabbusi bilan ushbu dastur bo'yicha ilk offline dars tashkil etildi. Darsda dasturning asosiy g'oyaviy-ilmiy maqsadi haqida ham so'z borib, talabalarga ko'nikma va tushunchalar berib o'tildi.

Medical English dasturi darsida institutning turli bosqich talabalari ishtirok etishdi.



Institut matbuot xizmati

Oilaviy tibbiyot kafedrasining yangi binosi ochildi

Respublikamizda sog'liqni saqlash tizimida amalga oshirilayotgan islohotlarni ustuvor yo'nalishlaridan biri bu birlamchi muassasalarini ishlashi, ularda faoliyat ko'rsatayotgan tibbiyot xodimlarini malakasini oshirish, o'quv bazalar moddiy-texnik ta'minotini yaxshilashdan iborat.

Institutimiz rahbariyatining tashabbusi bilan Samarqand shahar 3-son oilaviy poliklinika bazasida joylashgan diplomdan keyingi ta'lim fakulteti "Umumiy amaliyot/oilaviy tibbiyot" kafedrasini kapital qayta ta'mirdan chiqarildi. Mazkur kafedrada viloyatimiz va qo'shni viloyatlar oilaviy poliklinikalarini deyarli barcha shifokorlari o'z malakalarini oshiradilar.

Yangilangan kafedrani tantanali ochilishida institut rektori Jasur Rizayev kafedralar moddiy-texnik ta'minotini kuchaytirish va o'quv jarayonini sifat darajasini doimiy ravishda yuksaltirish eng ustuvor vazifa ekanligini ta'kidlab o'tdi. So'z olgan kafedra xodimlari va o'z malakalarini oshirilayotgan kursantlar institut rahbariyatiga yaratilgan sharoitlar uchun o'z minnatdorchiliklarini bildirib o'tdilar.

Kafedra amaliy ko'nikmalarni o'rgatish kabineti, axborot resurslar kabineti, oilaviy shifokor ish joyi kabinet-modeli, o'qituvchilar xonalari,



o'quv xonalar hamda katta konferens-zal eng zamonaviy uskunalar bilan jihozlab berildi.

Ta'kidlash lozim, institut mazkur kafedrasini xodimlari tibbiyot tizimi birlamchi bo'g'inlari bilan doimiy ravishda hamkorlikda

bo'lib, oilaviy shifokorlarga muntazam ravishda konsultatsiyalar berib hamda og'ir bemorlarni klinik tekshiruvlarini tashkil qilish ishlarini amalga oshirib kelmoqdalar.

Institut matbuot kotibi

Institut kuzatuv kengashining birinchi majlisi o'tkazildi



Prezident Shavkat Mirziyoyev tomonidan 24-dekabr kuni imzolangan "Davlat oliy ta'lim muassasalariga akademik va tashkiliy-boshqaruvda mustaqillik berish to'g'risida"gi va "Davlat oliy ta'lim muassasalariga moliyaviy mustaqillik berish to'g'risida"gi qarorlari bo'yicha 2022-yil 1-yanvardan boshlab O'zbekistonda 35 ta OTMga, shu jumladan Samarqand davlat tibbiyot institutiga ham moliyaviy va tashkiliy boshqaruv masalalarida mustaqillik berildi.

Moliyaviy mustaqillik olgan oliygo'hlarda "Kuzatuv kengash"lar tashkil etilib, ular keng masalalarni, shu jumladan oliy ta'lim muassasasining uzoq va o'rta muddatli strategik rivojlantirish dasturini tasdiqlash, xalqaro e'tirof etilgan tashkilotlar reytingining yuqori o'rinlaridan joy olish bo'yicha maqsadli chora-tadbirlarni belgilash hamda uning amalga oshirilishini nazorat qilib borish, o'rta muddat uchun shakllantiriladigan biznes-rejasi hamda daromadlar va

xarajatlar parametrlarini tasdiqlash, ularning ijrosini muhokama qilish, ta'lim yo'nalishlari, mutaxassisliklar hamda ixtisosliklar bo'yicha to'lov-kontrakt asosida o'qishga qabul parametrlarini belgilash to'g'risida qaror qabul qilish, oliy ta'lim muassasasini rivojlantirish va uning moliyaviy faoliyati bilan bog'liq masalalarni hal etish, shu jumladan nodavlat notijorat tashkiloti ko'rinishida maqsadli kapital jamg'armasini shakllantirish va byudjetdan tashqari rivojlantirish jamg'armasi mablag'laridan foydalanish tartibini, shu jumladan xarajatlarning taqsimlanish ulushini mustaqil belgilashni nazorat qiluvchi organ deb belgilangan.

5 – fevral kuni Institut kuzatuv kengashining 1-majlisi onlayn tarzda o'tkazildi. Yig'ilishda jami 10 nafar kuzatuv kengashini a'zolari, shu jumladan institut rektori, prorektorlar, viloyat tibbiyot muassasalarini rahbarlari ishtirok etdilar. Majlisi kuzatuv kengashi raisi, Sog'liqni saqlash vazirini o'rinbosari Ulugbek Sabirov ochib berdi.

Majlisda institut rektori Jasur Rizayev taklifi bilan SamDTIda 2022-yilda amalga oshirilishi lozim bo'lgan bir qator masalalar ko'rib chiqildi. Jumladan, "Samarqand davlat tibbiyot institutining Kuzatuv kengashi to'g'risidagi Nizom"ni tasdiqlash, "Samarqand davlat tibbiyot institutining 2022-yil uchun biznes-rejasi"ni tasdiqlash, "Samarqand davlat tibbiyot institutining professor-o'qituvchilari va xodimlarini byudjetdan tashqari (to'lov kontrakt hamda rivojlantirish jamg'armasi) mablag'lar hisobidan moddiy rag'batlantirish tartibi to'g'risidagi Nizom"ni tasdiqlash va boshqa bir qator masalalar ko'rib chiqildi. Majlis ishtirokchilari, muhokama qilingan ishlar va qabul qilingan hujjatlar institutni yanada yuksaltirishga turtki bo'lishini ta'kidlab o'tdilar.

O'z muxbirimiz.


KLINIK ORDINATORLARNING YAKUNIY DAVLAT ATTESTATSIYASI

Hozirgi kunda yetuk va malakali tibbiy kadrlar yetishtirib berish masalasi zamon talabidir. Va bu talab bevosita tibbiyot o'quv muassasalariga qaratiladi.

Tibbiy OTMlarda ta'lim jarayonini yuqori saviyada tashkil etish muhim ahamiyatga egadir. Zero o'quv jarayonlari va imtihonlarning to'g'ri va zamon talabiga mos shaffof tarzda o'tishi malakali mutaxassislar tayyorlash yo'lidagi muhim vosita bo'lib xizmat qiladi desak mubolag'a bo'lmaydi.

Xususan, institutda ham boshqa OTMlar singari attestatsiya jarayonlari o'tkazildi. Attestatsiyada O'quv ishlari bo'yicha prorektor Nargiza Yarmuxamedova, Ilmiy ishlar va innovatsiyalar bo'yicha prorektor Shuxrat Ziyadullaevlar ishtirok etib, yig'ilgan klinik ordinatordarga muvaffaqiyat va omad tiladilar.

Ma'lumot uchun, Akusher va ginekologiya mutaxassisligi bo'yicha 26 nafar, endokrinologiya mutaxassisligi bo'yicha 6 nafar, kardiologiya



bo'yicha 18 nafar, umumiy xirurgiya bo'yicha 4 nafar va Yuz-jag' xirurgiyasi mutaxassisligi bo'yicha 3 nafar, jami 57 nafar ordinatura rezidentlari yakuniy davlat attestatsiyasini topshirdi.

O'z muxbirimiz.

“Sog‘lom turmush tarzi sog‘liq garovi”

Joriy yilning 18-fevralida Ma'naviy yuksalish va vatanparvarlik kuni doirasida Samarqand 13060-harbiy qism Madaniyat markazida uchrashuv bo‘lib o‘tdi.

“Sog‘lom turmush tarzi sog‘liq garovi” mavzusida kechgan uchrashuvda Samarqand davlat tibbiyot instituti o‘qituvchilari ham ishtirok etishdi.

Tibbiyot olamiga o‘zining ulkan hissasini qo‘shgan ulug‘ bobokalonimiz Abu Ali ibn Sinoning hayoti va ijodi, bizga qoldirgan boy merosi yuzasidan fikrlar almashinildi. Shuningdek, harbiy xizmatchilar va ularning oilalarida sog‘lom turmush tarzini keng targ‘ib qilish, shaxsiy gigiyena va to‘g‘ri ovqatlanishga e‘tibor qaratish, muntazam sport bilan shug‘ullanish hamda turli virusli kasalliklardan himoyalaniish to‘g‘risida ma‘lumotlar berildi.

Tadbir so‘ngida harbiy xizmatchilar o‘zlarini qiziqtirgan bir qator savollarga javob oldilar.



“Harbiy shifokor — sharfli kasb”



2022 yilning 17-fevral kuni institut davolash fakulteti 5-kurs talabarlari hamda tibbiy profilaktika, jamoat salomatligi va tibbiy biologiya fakulteti 4-kurs talabalarini O‘zbekiston Respublikasi Qurolli Kuchlari Harbiy tibbiyot akademiyasiga nomzodlarni saralash maqsadida “Harbiy shifokor — sharfli kasb” mavzusida targ‘ibot-tashviqot yig‘ilishining davra suhbatini bo‘lib o‘tdi.

Uchrashuvda SamDTI Davolash ishi fakulteti dekan o‘rinbosarlari N.A. Muradova, Z.Z. Umarqulov, T. X. Nabiyev 4-5-kurs talabalardan 450 nafari, Samarqand viloyat MIB mutaxassisi q.k. xizmatchisi Tursunov SH. SH., O‘zbekiston Respublikasi Qurolli Kuchlari Harbiy tibbiyot akademiyasi mas‘ul ofitserlari polkovnigi Xalimov B.X., hamda

Samarqand harbiy hospitali katta ordinatori kapitani Nazarov Y.Z. lar qatnashdi.

Uchrashuvda O‘zbekiston Respublikasi Qurolli Kuchlari harbiy tibbiyot akademiyasiga nomzodlarni saralash maqsadida “Harbiy shifokor-sharfli kasb” mavzusida targ‘ibot – tashviqot suhbatini olib borildi.

Tadbir O‘zbekiston Respublikasi Qurolli Kuchlari Harbiy tibbiyot akademiyasi haqida videorolik bilan boshlandi va slaydlar orqali to‘ldiruvchi ma‘lumotlar berib o‘tildi.

Shuningdek, kun tartibidagi masalalar bo‘yicha O‘zbekiston Respublikasi Qurolli Kuchlari Harbiy tibbiyot akademiyasi kafedra boshlig‘i t/x polkovnigi Xalimov B.X. so‘zga chiqib, harbiy tibbiyot akademiyasi haqida hamda harbiy xizmatchilarga


beriladigan imtiyozlar haqida ma‘lumot berib o‘tdi. Shu masala yuzasidan Samarqand harbiy hospitali katta ordinatori t/x kapitani Nazarov Y.Z. so‘zga chiqib, harbiy tibbiyot akademiyasiga kiruvchi nomzodlarga qo‘yiladigan talablar va qabul qilish tartiblari haqida ma‘lumotlar berdi.

Tadbir so‘ngida talabalarni qiziqtirgan savolariga Harbiy tibbiyot akademiyasidan kelgan mas‘ul xodimlar va Samarqand viloyat MIB mutaxassislari tomonidan javoblar berildi.

S.Muhiddinov,

Yoshlar bilan ishlash ma'naviyat va ma'rifat bo'limi uslubchisi

Ilmiy-tadqiqot va nashriyot ishlari bo‘yicha o‘quv seminar



Nufuzli xalqaro ilmiy jurnallarda nashr etish faolligini va xodimlarning ilmiy-tadqiqot ishlari natijalarini rasmiylashtirish bo‘yicha bilimlarini oshirish maqsadida 2022-yil 5-fevraldan boshlab institutimizda yangi tadqiqotchilar va yosh olimlar uchun maxsus o‘quv kurs boshlandi. Ushbu kursda kafedralar va kurslar assistentlari, doktorantlar, mustaqil izlanuvchilar va institut magistratura bosqichining rezidentlari qatnashdilar.

O‘quv kurs ilmiy muammoni shakllanishidan boshlab, ilmiy maqola va tezislarni yozish va nashr etish, adabiyotlarni tanlash va tayyorlash, tadqiqotning asosiy turlari va statistik ma‘lumotlarni qayta ishlash asoslari bilan tanishish, tadqiqot loyihalari va grantlar, axloqiy komissiyadan o‘tish uchun ma‘lumotlarni taqdim etish va ilmiy tadqiqot ishlarining barcha tomonlarini qamrab oladi.

O‘quv kursning birinchi kunida institutning yangi binosi majlislar zalida Ijtimoiy va gumanitar fanlar kafedrasini mudiri, PhD, Aziza Maxmudova “Maqolalar tayyorlash va chop etish asoslari” mavzuda ma‘ruza qildi. Taqdimotda reytingi yuqori jurnallarda chop etilishning institut reytingini oshirishida katta ahamiyati, ilmiy maqola tushunchasini aniqlash, ularni yozish va loyihalash metodologiyasi, chop etish uchun jurnallarni izlash va tanlash, iqtibos va impakt faktor, shuningdek, zamonaviy ilmiy tadqiqotlarning boshqa tarkibiy qismlariga bag‘ishlangan masalalar yoritildi.


Seminar juda faol ruhda o‘tdi, ma‘ruzachi seminar ishtirokchilarining ko‘plab savollariga javob berdi.

O.Axmedov, Institut matbuot xizmati rahbari


Davlat stipendiyalari sovrindorlari



Muxammedova
Fariza Farxodovna



Valiyeva Sadoqat
Shokirovna



Djalolov Davlatshox
Abduvoxiidovich



Shamsiyev Ozodbek
Fazliddinovich

O'zbekiston Respublikasi Oliy va o'rta maxsus ta'lim vazirligining 2022-yil 14-fevraldagi buyrug'iga asosan Respublika oliy ta'lim muassasalari talabalari o'rtasidagi davlat stipendiyalari sohiblari tasdiqlandi. Mazkur qarorga muvofiq, institutning quyidagi talabalari O'zbekiston Respublikasi Prezidenti va nomli davlat stipendiyalari sohibi bo'lishdi:

Pediatriya fakulteti 6-kurs talabasi Muxammedova Fariza Farxodovna 2021/2022 o'quv yili uchun bakalavriat bosqichida O'zbekiston Respublikasi Prezidenti Davlat stipendiyasiga sazovor bo'ldi; Pediatriya fakulteti 6-kurs talabasi Valiyeva Sadoqat Shokirovna

Islom Karimov nomli Davlat stipendiyasi sohibi bo'ldi.

Bundan tashqari, 2021/2022 o'quv yili uchun 2 nafar talaba Ibn Sino nomli davlat stipendiyasi g'olibi bo'lishdi. Jumladan, Pediatriya fakulteti 6-kurs talabasi Djalolov Davlatshox Abduvoxiidovich va Davolash fakulteti 5-kurs talabasi Shamsiyev Ozodbek Fazliddinovichlar.

Talabalarimizni erishgan yuksak yutuqlari bilan tabriklaymiz va ularga hayotda yangi zafarlar tilaymiz!

U. Payzullaeva,
iqtidorli talabalar bilan ishlash bo'limi boshlig'i

“Uch avlod uchrashuvi”



Institut stomatologiya fakulteti talabalari bilan “Uch avlod uchrashuvi” doirasida Afg'onistonda xalqaro terrorizm va ekstrimizmga qarshi harbiy harakatlarning tugaganligining hamda harbiy qismlar olib chiqarilganligining 33 yilligi munosabati davra suhbatini bo'lib o'tdi.

Yig'ilish Samarqand shahar tibbiyot birlashmasi anesteziologiya va reanimatsiya bo'limi oliy toifali shifokori Murtazayev Xabibullo Murtazayevich ham ishtirok yetdi.

Uchrashuvda, shuningdek, afg'on urushida tibbiyot xodimlarining fidokorona xizmatlari, matonati, askarlarga ko'rsatgan yuksak yordamlari tilga olinib, hamma zamonlarda tibbiyot sohasi vakillariga bo'lgan ehtiyoj yuqori bo'lganligi ta'kidlandi.

S. Sultonov,
stomatologiya fakulteti dekani o'rinbosari

Bahor gullarida sening iforing...

Zulfiyahonim hotirasiga

Bahor gullarida sening iforing,
Muzlagan dillarda tiriladi jon.
Izg'irin kunlarning oxiri mayin,
Kaftingda uyg'onar jajji polapon.

Muzliklar ketidan erigan qolar,
Bahorga almashsin tosh yuragini.
Sening sochlaringda erimaydi qor,
Mening yuragimga solmaydi g'ubor.

Sen kimsan asli sen bahor gulshani,
Poyingda ochilar olam gullari.
Jannatlar ochilsa eshigin bir bor,
Ko'rmaysan yuzlarda g'amgin ko'zlarni.

Toparsan Zulfiya oroming bugun,
Chorlaysan yonigga boychechaklarni.
Hotirang yozilgan kitobga bir kun,
O'qiyman umrimning poyonlarini.

«Sen ketding»

Sen ketding bog'imga qaytmadi bahor,
Sang'iydi ko'chamda tentiragan qish.
Sen ketding hovlimda ertalab nahor,
Motam kuylagida sayramaydi qush.

Sen ketding yil bo'yi qishda sovqotdim,
Laylak qor dardimga bo'lmadi yupanch.
Sen ketding Tangrimga rosa yolvordim,
Sevgimning diliga qayta sol ishonch.

Sen ketding izingdan sundi yaproqlar,
Mezon uchuradi meni ildizsiz.
Sen ketding shoxlarda ochmas g'unchalar,
Daraxtlar yig'laydi unsiz va unsiz.

Sen ketding batamom tugadi hayot,
Tilimda sevgisiz so'zsiz ne demak.
Rahm qil sevgilim bari homhayol.
Dunyoda sensiz ham yashashim kerak.

Zeboxon Xolmatova.
Pastdarg'om tumani, Juma shahri.
SAMDTI sobiq talabasi.

SAMIYEV UTKUR BASIROVICH

(1952 - 2022)



Samarqand davlat tibbiyot instituti jamoasi og'ir judolikka uchradi. Beshafqat o'lim oramizdan taniqli olim, mohir pedagog, qo'li em shifokor, ichki kasalliklari propedevtikasi kafedrasida dotsenti, tibbiyot fanlari nomzodi Samiyev Utkur Basirovichni olib ketdi.

Utkur Basirovich Samiyev 1952-yilda Samarqand tumani Xaymari qishlog'ida tug'ilgan. 1969-1970 yy Samarqand

davlat tibbiyot instituti katta preparatori bo'lib ishlagan, U.Samiyev 1970-1976 yy Samarqand Davlat tibbiyot instituti davolash fakulteti imtiyozli diplom bilan tamomlagandan so'ng, 1976-1978-yillarda Samarqand davlat tibbiyot instituti klinik ordinatori, 1978-1979-yillarda Samarqand tuman tibbiyot birlashmasi vrach terapevti bo'lib ishladi.

Utkur Basirovich 1980-1983-yillarda institutda aspiranturada tahsil oldi. 1983-1987-yillarda institut assistenti lavozimida ish faoliyatini boshlab, 1987-1993-yillarda davolash fakulteti dekani o'rinbosari sifatida ish faoliyatini davom ettirdi.

U.B.Samiyev 1993-1998-yillarda institut 1-son ichki ichki kasalliklar kafedrasida dotsenti lavozimida ishladi. Utkur Basirovich 1998-2006-yillarda institut ma'naviyat va ma'rifati ishlari bo'yicha prorektori lavozimida faoliyat ko'rsatib, yoshlar tarbiyasi va ma'naviy ma'rifiy ishlarni takomillashtirishda munosib hissasi qo'shib institut va viloyat jamoasi o'rtasida ulkan muvaffaqiyat qozondi.

Utkur Samiyev 2006-yildan 2011-yilgacha ichki kasalliklar propedevtikasi kafedrasida mudiri va 2011-yildan bugunga qadar mazkur kafedra dotsenti lavozimida faoliyat ko'rsatib magistr va talabalariga saboq berib kelmoqda edi.

U.B.Samiyev 1986-yilda nomzodlik dissertatsiyasini himoya qilgach,

bugunga qadar tomonidan 200 dan ortiq ilmiy ishlari chop etilgan, 15 dan ortiq o'quv-uslubiy qo'llanmalar, 14 ta ixtiro va 3 ta monografiya muallifi. U kishining rahbarligida 2 ta nomzodlik dissertatsiyasi himoya qilingan. Olim ilmiy ishlarda faol bo'lib Respublika, MDH va Yevropa davlatlarida o'tkazilgan ko'plab nufuzli konferensiyalarda ishtirok etib, uning ilmiy faoliyati ko'plab imtiyozli diplom va sertifikatlar bilan e'tirof etilgan. U.B.Samiyev ichki kasalliklar propedevtikasi kafedrasida faoliyati davomida institut 1-son klinikasi kardiologiya bo'limiga kelgan bemorlar dardiga malham bo'lishda o'zining munosib hissasini qo'shib keldi.

Dotsent Utkur Samiyev katta hayotiy tajriba va chuqur bilimga ega bo'lgan mohir pedagog sifatida institut talaba-yoshlariga chuqur bilim berishda o'zining munosib hissasini qo'shgan. O'zining insonparvarligi, xalqchilligi tufayli viloyat va shahar jamoatchiligi o'rtasida katta hurmat e'tiborga sazovor bo'ldi. Mehribon ota, oilaparvar inson sifatida 2 farzandni tarbiyalab, hayotda o'zlarining munosib o'rinlarini topishlariga yetarlicha shart-sharoit yaratdi.

Samiyev Utkur Basirovich ko'p yillik samarali mehnati va 1979-1980-yillarda Afg'onistonda janglarda xizmat qilganligi uchun 1989-yilda "Afg'on xalqi nomidan minnatdorlik" ko'krak nishoni hamda 2001-yilda "O'zbekiston Respublikasi mustaqilligining 10 yilligi" ko'krak nishonlari hamda viloyat va shahar hokimliklarining "Faxriy yorliq"lari bilan taqdirlangan.

Samiyev Utkur Basirovich atrofda tilarning muhabbati va hurmatiga sazovor bo'lgan, bo'lajak yosh shifokohlarni doimiy maslahatgo'yi, mehribon va ajoyib inson edi. U.B.Samiyevning yorqin xotirasi qalbimizda abadiy saqlanajak.

Samarqand davlat tibbiyot instituti ma'muriyati va kasaba uyushmasi qo'mitasi hamda 1-son klinikasi ma'muriyati

Institut xodimlari — sport va sog'lom hayot tarafdori



Sog'lom turmush tarzini yo'lga qo'yishning vositalaridan biri bu muntazam sport bilan shug'ullanishdir. Albatta, sport — sog'lik garovi.

Xususan, institut jamoasi ham sog'lom hayot tarzi tarafdori. Buning yorqin dalili o'laroq bugun pediatriya fakulteti dekani tashabbusi bilan fakultet zam dekanlar, xodimlari va tyutorlari "Sport sog'lik garovi" shiori ostida turli sport o'yinlari tashkil yetildi. Oliyog'ning bir guruh xodimlari institut litseyidagi sport zaliga tashrif buyurishdi. Zalda voleybol, basketbol va boshqa sport o'yinlari bilan shug'ullanishdi.

Bundan maqsad nafaqat, institut xodimlarining ishdan bo'sh vaqtlarini mazmunli o'tkazish, balki, butun institut va o'sib kelayotgan yosh avlodga sog'lom turmush tarzini targ'ib qilishdan iborat desak, mubolag'a bo'lmaydi.

Sport — salomatlik garovi!



Aholi va yoshlar o'rtasida sog'lom turmush tarzini targ'ib qilish, sog'lom turmush tarziga intilishlarini shakllantirish, bo'sh vaqtlarini mazmunli tashkil etish, ularni sportga bo'lgan qiziqishlarini oshirish, sport turlari bilan shug'ullanishlari uchun sport to'garaklariga jalb etish bugungi kunning asosiy vazifalaridan biridir.

Sog'lom turmush tarzi, inson salomatligini asrash, uzoq umr ko'rishning garovi ekanligi hammamiz uchun ayon haqiqat bo'lib, aholining sog'lom turmush tarzi va farovon hayoti ifodasi hisoblanadi.

Institutda bu sohada talaygina ishlar amalga oshirilib kelinmoqda, xususan professor-o'qituvchilar va xodimlar, xotin-qizlar va yoshlarning barcha sport turlari bilan shug'ullanishlari uchun barcha sharoitlar yaratilgan. Institutni xotin-qizlar jamoasi ham bunday imkoniyatlardan unumli foydalanib, bo'sh vaqtlarida muntazam ravishda sport turlari bilan shug'ullanib, sog'liqlarini mustahkamlab kelishmoqdalar.

M.Murodov, fuqaro mudofaasi, jismoniy tarbiya va sport kafedrasida mudiri



SAMDTI QUIYIDAGI LAVOZIMLARGA TANLOV E'LON QILADI

PEDIATRIYA FAKULTETI

3-son pediatriya va tibbiy genetika kafedrasida, stajer-assistent lavozimiga - 2 o'rin; Nurli diagnostika va terapiya kafedrasida, assistent lavozimiga - 1 o'rin; Nurli diagnostika va terapiya kafedrasida, stajer-assistent lavozimiga - 1 o'rin;

STOMATOLOGIYA FAKULTETI

Ortopedik stomatologiya kafedrasida, assistent lavozimiga - 1 ta o'rin;

FARMATSIYA FAKULTETI

Klinik farmakologiya kafedrasida, assistent lavozimiga - 2 o'rin; Farmakognoziya va farmasevtik texnologiyalar kafedrasida, stajer-assistent lavozimiga - 2 o'rin; Farmakologiya kafedrasida, stajer-assistent lavozimiga - 2 o'rin; Tibbiy kimyo kafedrasida, stajer-assistent lavozimiga - 1 o'rin; Biologik kimyo stajer-assistent lavozimiga - 2 o'rin;

TIBBIY PROFILAKTIKA, JAMOAT SALOMATLIGI VA TIBBIY BIOLOGIYA FAKULTETI

Umumiy gigiena va ekologiya kafedrasida, assistent lavozimiga - 1 ta o'rin;

Ilmiy kotib U.U.Ochilov

Kafedra mudiri lavozimini egallash uchun tanlovda fan doktori, fan nomzodi ilmiy darajasiga, professor yoki dotsent ilmiy unvoniga, shuningdek falsafa doktori (PhD) ilmiy darajasiga ega bo'lgan shaxslar qatnashishi mumkin. O'qituvchi lavozimini egallash uchun tegishli mutaxassislik bo'yicha oliy ma'lumotga ega bo'lgan shaxslar (magistr, diplomli mutaxassis) qatnashishi mumkin. Hujjatlar e'lon qilingan kundan boshlab bir oy davomida qabul qilinadi. Manzil: Samarqand shahri A.Temur ko'chasi, 18 u Ilmiy kotib U. OCHILOV

MASTER KLASS

Sana 04.03.2022/soat 16:30

- Yo'nalishlar: 1. Kompyuter texnologiyalari (rus tilida) soxa egasi M.P. Molikov 15 min 2. Kompyuter grafikasi va web dizayn (o'zbek tilida) soxa egasi A.T. Keldiyarov, N. Nematov 15 min. 3. Tibbiyotda axborot tizimlari soha egasi A.M. Voxidov 15 min. 4. Xirurgiyada zamonaviy texnologiyalar. soha egasi A.SH. DJalilov Kafedra - Informatika va information texnologiyalar Manzil - 1-TTJ_Manaviyat xonasi Taklif etiladi: BARCHA XOHLOVCHILAR

OCHIQ MA'RUZA E'LONLARI

Samarqand davlat tibbiyot instituti «3-ichki kasalliklar» kafedrasida 2022 yil 28 fevral kuni ichki kasalliklar fanidan soat 12:30da kafedraning ma'ruzalar zalida davolash fakultetining 437-440- guruhleri talabalari uchun ochiq ma'ruza bo'lib o'tadi.

Mavzu: Biriktiruvchi to'qima tizimli kasalliklari, etiologiyasi, tasnifi, klinikasi. Tashxislash. Davolash tamoyillari va profilaktikasi.

Ma'ruzachi: 3-ichki kasalliklar kafedrasida assistenti, PhD Po'latov Ulug'bek Sunatovich.

Kafedra mudiri: t.f.d., prof. Shodikulova G.Z.

Manzil: 3-ichki kasalliklar kafedrasining ma'ruzalar zali.

Taklif qilinganlar: Davolash fakulteti 437-440-guruhleri talabalari, klinik ordinatorlar, magistrlar, bo'lim vrachlari, o'quv bo'limi va barcha qiziquvchilar.

SamDTI Pediatriya fakulteti ichki kasalliklar kafedrasida 2022-yil 7-mart kuni soat 13:10da Pediatriya fakulteti III-kurs guruhleri talabalari uchun ochiq ma'ruza bo'lib o'tadi.

Mavzu: Zotiljamlar. Etiologiya, patogenez, klinika, diagnostika. Zamonaviy davolash usullari, profilaktika.

Ma'ruzachi: PhD, dos: Ishankulova D.K.

Ekspertlar: 1. Davolash fakulteti, 2-Ichki kasalliklar kafedrasida mudiri t.f.d., prof. Tashkenbaeva E.N. 2. RShTYoIMSF 1-shoshilinch terapiya bulimi mudiri Rofeev M.Sh.

O'tkazish joyi: Pediatriya fakulteti ichki kasalliklar kafedrasida ma'ruza zali

Taklif qilinganlar: Pediatriya fakulteti III-kurs guruhleri talabalari, Ichki kasalliklar kafedralari va dekanat xodimlari, klinik ordinatorlar va magistrlar.

SamDTI 3-Pediatriya va tibbiy genetika kafedrasida 2022-yil 1-mart kuni fakultet pediatriya fanidan soat 11:10da Pediatriya fakulteti 301-305-guruhlar talabalari uchun ochiq ma'ruza bo'lib o'tadi.

Mavzu: Raxit etiopatogenezi, tasnifi. Vitamin Dning organizmdagi metabolizmi. Raxitni rivojlanishiga olib keluvchi omillar.

Ma'ruzachi: 3-Pediatriya va tibbiy genetika kafedrasining dotsenti, t.f.d. Sharipova O.A.

Manzil: 3-Pediatriya va tibbiy genetika kafedrasida ma'ruza zali

Taklif qilinganlar: Pediatriya fakulteti 301-305-guruhlar talabalari, klinik ordinatorlar, magistrlar, o'quv bo'limi va barcha qiziquvchilar.

SamDTI urologiya kafedrasida 2022-yil 9-mart kuni urologiya fanidan soat 11:30da pediatriya fakulteti 501-505-guruhlar talabalari uchun ochiq ma'ruza bo'lib o'tadi.

Mavzu: Bolalar buyrak va siydik ajratish tizimi rivojlanish nuqsonlari.

Ma'ruzachi: urologiya kafedrasida professor, t.f.d. Allazov S.A.

Kafedra mudiri: dots. Shodmonova Z.R.

Manzil: Respublika shoshilinch tibbiy yordam ilmiy markazi Samarqand filiali majlislar zali (2-qavat).

Taklif qilinganlar: Pediatriya fakulteti 501-505-guruhleri talabalari, klinik ordinatorlar, magistrlar, bo'lim vrachlari, viloyat urologiya ilmiy jamiyati a'zolari, pediatrlar, o'quv bo'limi va barcha qiziquvchilar.

Tahririyat raisi: J.A. RIZAYEV

Bosh muharrir: E.S. TANGIROV

Tahrir hay'ati: G.U. LUTFULLAEV, S.A. KARABAEV, S.E. MAMARADJABOV, A.A. AXMEDOV, J.F. KADIROV.

SHIFOKOR SO'ZI

Nashr uchun mas'ul: S. Halimov

Operator va sahifalovchi: A.KELDIYAROV Fotomuxbir: O. AXMEDOV

Gazeta Samarqand viloyat matbuot va axborot boshqarmasi tomonidan 18.01.2007 y. 09-33 raqami bilan ro'yxatga olingan. INDEKS: 5539

Gazeta har oyda bir marta to'liq rangli shaklda chop etiladi va bepul tarqatiladi

MANZIL: Samarqand shahri, Amir Temur ko'chasi 18-uy. Tel: (99866) 233-09-76 Faks: (99866) 233-71-75 e-mail: shifokor@samti.uz, sammi@sammi.uz

Gazeta SamDTI bosmaxonasida, ofset usulida chop etiladi. Nashrga ruxsat berildi: 2022 yil, 21 Fevral Adadi 200 nusxa. Buyurtma: 41